

“ТЎРТКЎЛ ПАХТА ТОЗАЛАШ” АКЦИЯДОРЛИК ЖАМИЯТИ АКЦИЯДОРЛАРИНИНГ НАВБАТДАН ТАШҚАРИ УМУМИЙ ЙИҒИЛИШИ БАЁННОМАСИ

**Қорақалпоғистон Республикаси,
Тўрткўл тумани,
Беруний кўчаси, 1-уй**

2025 йил 15 октябрь

Умумий йиғилишнинг ўтиш жойи: Қорақалпоғистон Республикаси, Тўрткўл тумани, Беруний кўчаси, 1-уйда “Тўрткўл пахта тозалаш” АЖ маъмурий биносининг мажлислар зали.

Акциядорларни рўйхатдан ўтказиш бошланган вақт: **10:00**

Акциядорларни рўйхатдан ўтказиш тугаган вақт: **10:55**

Акциядорлар умумий йиғилиш бошланган вақт: **11:00**

Жамиятнинг овоз берувчи акцияларига эгалик қилувчи акциядорлар эга бўлган овозларнинг умумий сони – 409 263 дона.

“Тўрткўл пахта тозалаш” АЖ акциядорларининг навбатдан ташқари умумий йиғилиши (келгусида матн давомида - Йиғилиш) кузатув кенгаши томонидан 2025 йил 16 сентябрда қабул қилинган қарорга мувофиқ ўтказилмоқда.

Жамият кузатув кенгаши раиси Е.Кунназаров йиғилиш раёсатини ва котибини сайлаш бўйича таклиф берди.

Акциядорлар томонидан очиқ овоз бериш йўли билан бир овоздан йиғилиш раёсатига қуйидагилар сайланди:

1. Е.Кунназаров - Кузатув кенгаши раиси;
2. Ж.Серикбаев - “Тўрткўл пахта тозалаш” АЖ директори;
3. Т.Баимбетов - “Тўрткўл пахта тозалаш” АЖ акциядори;

Акциядорлар томонидан очиқ овоз бериш йўли билан бир овоздан йиғилишда раислик қилувчи этиб, жамият кузатув кенгаши раиси Е.Кунназаров ва йиғилиш котиби этиб жамиятнинг бош бухгалтери З.Миримов сайланди.

Йиғилишни, йиғилишда раислик қилувчи Е.Кунназаров очди ва акциядорлар ҳамда йиғилиш қатнашчиларини қутлаб, йиғилиш кворуми бўйича ахборот бериш учун сўзни санок комиссияси аъзоси С.Розимовга берди.

Санок комиссияси ахбороти:

“Тўрткўл пахта тозалаш” акциядорлик жамияти акциядорлар реестрига мувофиқ, йиғилишда овоз бериш учун 659 та акциядорга тегишли 409 263 дона акциялар қатнашиши мумкин. Акциядорларни рўйхатдан ўтказиш вақти тугаганда, умумий миқдорда 242 322 дона овоз берувчи акцияларга эга бўлган 7 та акциядор (унинг вакили) рўйхатдан ўтди. Бу эса умумий овоз берувчи акцияларнинг 59.2 % ни ташкил этади ва йиғилиш ваколатли (кворумга эга) ҳисобланади.

Йиғилишга таклиф этилганлар:

В.Умарова – “Қорақалпоқпахтасаноат ХАБ” АЖ бош ҳисобчиси;

М.Маткаримова – “Қорақалпоқпахтасаноат ХАБ” АЖ акциядорлар билан корпоратив муносабатлар бўйича мутахассиси ;

Йиғилишда раислик қилувчи Е.Кунназаров йиғилиш кун тартибини эълон қилди.

КУН ТАРТИБИ:

1. Умумий йиғилиш регламенти ва санок комиссияси таркибини тасдиқлаш.
2. “Тўрткўл пахта тозалаш” АЖ ни “Беруний пахта тозалаш” АЖга қўшиб олиш.
3. Қўшиб олиш шартномасини тасдиқлаш.
4. Топшириш далолатномасини тасдиқлаш.
5. Акцияларни қайтариб сотиб олиш масаласи.

Кун тартиби эълон қилинганидан сўнг, муҳокамага ўтилди.

Кун тартибидаги биринчи масала бўйича йиғилишда раислик қилувчи Е.Кунназаров сўзга чиқиб, йиғилиш регламентини йиғилиш қатнашчиларига ўқиб эшиттирди. Мазкур йиғилиш кун тартибида 5 та масала кўрсатилганлигини ва ҳар бир масала бўйича маърузачига 5 (беш) дақиқадан, муҳокама учун 5 (беш) дақиқагача вақт ажратилиши мақсадга мувофиқ эканлигини айтиб, жамият акциядорларидан акциядорларнинг навбатдан ташқари умумий йиғилиши регламентини ушбу таклиф бўйича тасдиқлаш ҳамда “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Ўзбекистон Республикаси Қонунининг 66-моддасига асосан овозларни санаб чиқиш, акциядорларнинг умумий йиғилишида иштирок этиши учун акциядорларни рўйхатга олиш, шунингдек овоз бериш бюллетенларини тарқатиш учун жамият кузатув кенгаши томонидан санок комиссияси тузилиб, унинг аъзолари сони ва шахсий таркиби акциядорларнинг умумий йиғилиши томонидан тасдиқланишини айтди.

Шунга асосан, жамият кузатув кенгашинининг 2025 йил 16 сентябрдаги йиғилиш қарорига кўра санок комиссияси таркибига “Қорақалпоқпахтасаноат” ХАБ АЖ тугатиш комиссияси аъзоси – Д.Халмуратов, Жамиятнинг бош юристконсулти С.Розимов ва Жамиятнинг акциядорлар билан корпоратив муносабатлар бўйича мутахассиси –Д.Ибадуллаев номзодларини киритиш таклифи берилган, Д.Халмуратов акциядорларнинг навбатдан ташқари умумий йиғилишига келмаганлиги сабабли санок комиссияси таркибига жамият бош механиги Р.Балтаев номзодини киритиб, жамият акциядорларидан санок комиссияси сони ҳамда таркибини тасдиқлаш масаласи бўйича ўз муносабатларини бюллетен орқали овоз беришларини сўради.

Ушбу масала юзасидан овоз бериш натижалари:

“Ёқлаганлар” – 242 322 та овоз; “Қаршилар”- йўқ; “Бетарафлар”- йўқ.

Нотўғри тўлдирилган бюллетенлар йўқ.

Кун тартибидаги биринчи масала бўйича акциядорларнинг навбатдан ташқари умумий йиғилиши **қарор қилади:**

1. Жамият акциядорларининг навбатдан ташқари умумий йиғилиши регламенти тасдиқлансин.

2. Уч кишидан иборат куйидаги таркибда санок комиссияси тасдиқлансин:

- 1) С.Розимов;
- 2) Д. Ибадуллаев;
- 3) Р. Балтаев.

Кун тартибидаги иккинчи масала бўйича жамият директори Ж.Серикбаев сўзга чиқди.

Ўзбекистон Республикаси “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги қонуни 94-моддасига асосан қўшиб олинаётган жамият ва қўшиб олаётган юридик шахс қўшиб олиш тўғрисида шартнома тузади, унда қўшиб олиш тартиби ва шартлари, шунингдек қўшиб олинаётган жамиятнинг акцияларини қўшиб олаётган жамиятнинг акцияларига айирбошлаш тартиби белгилаб қўйилади. Ҳар бир юридик шахснинг кузатув кенгаши ёхуд ваколатли органи қўшиб олиш шаклида қайта ташкил этиш тўғрисидаги ва қўшиб олиш шартномасини тасдиқлаш ҳақидаги масалани қўшиб олишда иштирок этаётган ўз жамияти акциядорларининг умумий йиғилиши ҳал қилиши учун олиб чиқади.

Шу муносабат билан, “Тўрткўл пахта тозалаш” АЖни “Беруний пахта тозалаш” АЖга қўшиб олиш масаласини қонунчиликда белгиланган тартибда жамият акциядорлари умумий йиғилишида кўриб чиқиш учун кун тартибига киритилган.

Ж.Серикбаев ўз сўзида, Ўзбекистон Республикаси Президентининг 2020 йил 6 мартдаги “Пахтачилик соҳасида бозор тамойилларини кенг жорий этиш чора-тадбирлари тўғрисида”ги ПҚ-4633-сон қарорига асосан “Ўзпахтасаноат” АЖ ва унинг тизимидаги корхоналарни тугатишни жадаллаштириш, харажатларни қисқартириш мақсадида тугатилаётган “Ўзпахтасаноат” АЖ тизимидаги “Тўрткўл пахта тозалаш” акциядорлик жамиятини “Беруний пахта тозалаш” АЖга қўшиб олиш таклифини киритди.

Муҳокамаларда қўшиб олинаётган “Тўрткўл пахта тозалаш” акциядорлик жамиятининг барча ҳуқуқ ва мажбуриятлари топшириш далолатномасига мувофиқ қўшиб олаётган “Беруний пахта тозалаш” АЖга ўтиши ҳамда жамият тугатилиб, давлат реестридан чиқарилиши қайд этилди.

Муҳокамалардан сўнг йиғилишда раислик қилувчи Е.Кунназаров акциядорлардан директорнинг тугатилаётган “Ўзпахтасаноат” АЖ тизимидаги “Тўрткўл пахта тозалаш” акциядорлик жамиятларини “Беруний пахта тозалаш” АЖга қўшиб олиш масаласи бўйича ўз муносабатларини бюллетенда овоз бериш орқали билдиришларини сўради.

Ушбу масала юзасидан овоз бериш натижалари:

“Ёқлаганлар” – 212 484 та овоз; “Қаршилар”- 29 838; “Бетарафлар”- йўқ.
Нотўғри тўлдирилган бюллетенлар йўқ.

Кун тартибидаги иккинчи масала бўйича акциядорларнинг навбатдан ташқари умумий йиғилиши **қарор қилади:**

1. Тугатилаётган “Тўрткўл пахта тозалаш” акциядорлик жамияти “Беруний пахта тозалаш” АЖга *(ушбу жамият акциядорларининг умумий*

йиғилиши қарорларини инобатга олган ҳолда) қўшиб олинишига розилик берилсин.

Кун тартибидаги учинчи масала бўйича жамият бош ҳисобчиси З.Миримовга сўз берилди ва у Ўзбекистон Республикаси “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги қонунининг 94-моддасига асосан қўшиб олинаётган жамият ва қўшиб олаётган юридик шахс қўшиб олиш тўғрисида шартнома тузиш ҳамда қўшиб олиш тартиби ва шартлари, шунингдек қўшиб олинаётган жамиятнинг акцияларини қўшиб олаётган жамиятнинг акцияларига айирбошлаш тартиби белгилаб қўйилиши таъкидланган.

Ушбу талабларга асосан “Тўрткўл пахта тозалаш” акциядорлик жамиятини “Беруний пахта тозалаш” АЖга қўшиб олиш тўғрисида шартнома тайёрланган ва унда қўшиб олиш тартиби ва шартлари белгилаб қўйилган (*шартнома илова қилинади*).

Жумладан, шартномада томонларнинг ҳуқуқ ва мажбуриятлари, қўшилиш тартиби босқичлари, ҳуқуқий ворислик, шартноманинг амал қилиши ва уни муддатидан олдин бекор қилиш ҳамда бошқа шартлар белгиланган.

Шунингдек, шартномада қўшиб олинаётган жамиятнинг акцияларини қўшиб олаётган жамиятнинг акцияларига айирбошлаш тартиби ҳам белгилаб қўйилган. Хусусан, қўшиб олинаётган жамият акцияларини қўшиб олаётган жамият акцияларига айирбошлаш ушбу акциядорлик жамияти акцияларининг баҳоланган қиймати бўйича амалга оширилади (*қўшиб олиш шартномасининг 1, 1а).*

Кун тартибидаги масала атрофлича муҳокама қилинди. Хусусан, акцияларни баҳоланган қиймати бўйича айирбошлаш адолатли, ҳар бир жамият акциядорлари манфаатини кўзлаб қилинганлиги қайд этиб ўтилди.

Муҳокамалардан сўнг йиғилишда раислик қилувчи Е.Кунназаров акциядорлардан қўшиб олиш тўғрисидаги шартномасини тасдиқлаш масаласи бўйича ўз муносабатларини бюллетенда овоз бериш орқали билдиришларини сўради.

Ушбу масала юзасидан овоз бериш натижалари:

“Ёқлаганлар” – 212 484 та овоз; “Қаршилар”- 29 838; “Бетарафлар”- йўқ.

Нотўғри тўлдирилган бюллетенлар йўқ.

Кун тартибидаги учинчи масала бўйича акциядорларнинг навбатдан ташқари умумий йиғилиши **қарор қилади:**

1. Қўшиб олинаётган “Тўрткўл пахта тозалаш” АЖ ва қўшиб олаётган “Беруний пахта тозалаш” АЖ ўртасида қўшиб олиш тўғрисидаги шартномаси тасдиқлансин.

2. Қўшиб олинаётган “Тўрткўл пахта тозалаш” АЖ акцияларини қўшиб олаётган “Беруний пахта тозалаш” АЖ акцияларига айирбошлаш ушбу акциядорлик жамиятлари акцияларининг баҳоланган қиймати бўйича (*қўшиб олиш шартномасининг 1, 1а-иловага мувофиқ*) амалга оширилсин.

3. Жамият директори Ж.Серикбаевга:

- қўшиб олиш тўғрисида шартномани имзолаш;

- қўшиб олиш шартномасида белгиланган барча мажбурият ва чора-тадбирларни амалга ошириш вазифаси юклатилсин.

Кун тартибидаги тўртинчи масала бўйича бош ҳисобчи З.Миримов сўзга чиқди.

Юқорида қайд этилган қонуннинг 94-моддасига мувофиқ қўшиб олинаётган жамиятнинг кузатув кенгаши ёхуд ваколатли органи топшириш далолатномасини тасдиқлаш тўғрисидаги масалани ҳам жамиятлар акциядорларининг умумий йиғилиши ҳал қилиши учун олиб чиқади.

Шу муносабат билан, “Тўрткўл пахта тозалаш” АЖнинг активлар, ҳуқуқ ва мажбуриятларни инвентаризациядан ўтказиш ва унинг натижаларига кўра, ушбу актив ва мажбуриятларни “Беруний пахта тозалаш” АЖга топшириш тўғрисидаги топшириш далолатномаси лойиҳасини тасдиқлаш умумий йиғилиш кун тартибига киритилган.

Топшириш далолатномаси лойиҳаси таништирилди.

Шунингдек, қўшиб олаётган “Беруний пахта тозалаш” АЖга (ҳуқуқий ворисга) ўтадиган актив ва мажбуриятларни аниқлаш учун Ўзбекистон Республикаси бухгалтерия ҳисобининг тегишли миллий стандарти қоидаларига асосан санокдан ўтказиш (инвентаризация) ва натижаси бўйича санокдан ўтказиш далолатномасини тузиш, жамиятни қайта ташкил этиш ва унинг кредиторлари томонидан талаблар қўйиш тартиби ва муддатлари тўғрисида матбуотда эълон бериш, кредиторларни аниқлаш ва уларни жамиятни қайта ташкил этиш тўғрисида ёзма равишда хабардор қилиш ҳамда солиқ органлари, бюджетдан ташқари жамғармалар, юридик шахсларни рўйхатга олиш органи билан боғлиқ масалаларни ҳал қилиш ва жамиятни қайта ташкил этиш билан боғлиқ бошқа ташкилий тадбирларни амалга ошириш зарурлиги таъкидлаб ўтилди.

Муҳокамалардан сўнг йиғилишда раислик қилувчи Е.Кунназаров акциядорлардан кун тартибидаги масала бўйича ўз муносабатларини бюллетенда овоз бериш орқали билдиришларини сўради.

Ушбу масала юзасидан овоз бериш натижалари:

“Ёқлаганлар” – 212 484 та овоз; “Қаршилар”- 29 838; “Бетарафлар”- йўқ.

Нотўғри тўлдирилган бюллетенлар йўқ.

Кун тартибидаги тўртинчи масала бўйича акциядорларнинг навбатдан ташқари умумий йиғилиши **қарор қилади:**

Кун тартибидаги тўртинчи масала бўйича акциядорларнинг навбатдан ташқари умумий йиғилиши **қарор қилади:**

1. “Тўрткўл пахта тозалаш” АЖ директори Ж.Серикбаевга 30 кун муддатда қуйидагиларни амалга ошириш вазифаси юклатилсин:

- жамиятни қўшиб олаётган “Беруний пахта тозалаш” АЖга (ҳуқуқий ворисга) ўтадиган актив ва мажбуриятларни аниқлаш учун Ўзбекистон Республикаси бухгалтерия ҳисобининг тегишли миллий стандарти қоидаларига асосан санокдан ўтказиш (инвентаризация) ва натижаси бўйича санокдан ўтказиш далолатномасини тузиш;

- санокдан ўтказиш далолатномасини тузишда сотилмасдан жамият балансида қолган барча мол-мулклар, дебиторлик ва кредиторлик қарзлар,

кўчмас мулкка эгалик ҳуқуқини ва номоддий активлардан фойдаланиш ҳуқуқини тасдиқловчи ҳужжатлар мавжудлигига эътибор қаратиш;

- жамиятни қайта ташкил этиш ва унинг кредиторлари томонидан талаблар қўйиш тартиби ва муддатлари тўғрисида матбуотда эълон бериш;

- кредиторларни аниқлаш ва уларни жамиятни қайта ташкил этиш тўғрисида ёзма равишда хабардор қилиш;

- солиқ органлари, бюджетдан ташқари жамғармалар, юридик шахсларни рўйхатга олиш органи билан боғлиқ масалаларни ҳал қилиш ва жамиятни қайта ташкил этиш билан боғлиқ бошқа ташкилий тадбирларни амалга ошириш.

2. “Тўрткўл пахта тозалаш” АЖнинг актив, ҳуқуқ ва мажбуриятларни “Беруний пахта тозалаш” АЖга топшириш тўғрисида тузиладиган топшириш далолатномаси лойиҳаси тасдиқлансин ва уни имзолаш ҳамда санокдан ўтказиш натижаларига асосан актив, ҳуқуқ ва мажбуриятларни “Беруний пахта тозалаш” АЖга топшириш жамият директори Ж.Серикбаев зиммасига юклатилсин.

3. Топшириш далолатномаси қўшиб олинаётган “Тўрткўл пахта тозалаш” АЖ ва қўшиб олаётган “Беруний пахта тозалаш” АЖ акциядорларининг қўшма умумий йиғилишига тасдиқлаш учун киритилсин.

Кун тартибидаги бешинчи масала бўйича жамият директори Ж.Серикбаев сўзга чикди.

Ўзбекистон Республикаси “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги қонунининг 40-моддасига мувофиқ, овоз берувчи акцияларнинг эгалари бўлган акциядорлар жамиятни қайта ташкил этиш тўғрисида акциядорларнинг умумий йиғилиши томонидан қарорлар қабул қилишда, агар улар қарши овоз берган бўлса ёхуд овоз беришда узрли сабабларга кўра иштирок этмаган бўлса, ўзларига тегишли акцияларнинг ҳаммаси ёки бир қисми жамият томонидан қайтариб сотиб олинишини талаб қилишга ҳақлидир.

Ўзларига тегишли акциялар жамият томонидан қайтариб сотиб олинишини талаб қилиш ҳуқуқига эга бўлган акциядорларнинг рўйхати овоз бериш натижасида ушбу Қонунга мувофиқ акцияларни қайтариб сотиб олишни талаб қилиш ҳуқуқи юзага келиши мумкин бўлган масалалар кун тартибига киритилган акциядорлар умумий йиғилишида иштирок этиш ҳуқуқига эга бўлган жамият акциядорлари реестрининг маълумотлари асосида тузилади.

Жамият томонидан акцияларни қайтариб сотиб олиш ушбу акцияларнинг бозор қиймати бўйича амалга оширилади

Шунингдек, мазкур қонуннинг 41-моддага мувофиқ жамият акциядорларни ўзларига тегишли акцияларнинг жамият томонидан қайтариб сотиб олинишини талаб қилиш ҳуқуқи мавжудлиги, қайтариб сотиб олиш нархи ва қайтариб сотиб олишни амалга ошириш тартиби тўғрисида хабардор этиши шарт.

Акциядорларнинг умумий йиғилишида иштирок этиш ҳуқуқига эга бўлмаган акциядорларда акцияларнинг жамият томонидан қайтариб сотиб олинишини талаб қилиш ҳуқуқи мавжудлиги ва бундай ҳуқуқни амалга

ошириш тартиби тўғрисидаги ахборот акцияларнинг жамият томонидан қайтариб сотиб олинишини талаб қилиш ҳуқуқи юзага келишига сабаб бўлган қарор қабул қилинган кундан эътиборан етти кундан кечиктирмай акциядорларга юборилади.

Акциядорларнинг ўзларига тегишли акцияларнинг жамият томонидан қайтариб сотиб олиниши тўғрисидаги ёзма талаблари акциядорлар умумий йиғилишининг тегишли қарори қабул қилинган кундан эътиборан ўттиз кундан кечиктирмай жамиятга тақдим этилиши керак. Мазкур муддат тугаганидан сўнг жамият қайтариб сотиб олиш талабини қўйган акциядорлардан акцияларни ўн кун ичида қайтариб сотиб олиши шарт.

Жамият томонидан акцияларни қайтариб сотиб олишга йўналтириладиган маблағларнинг умумий суммаси акциядорларда ўзларига қарашли акцияларни қайтариб сотиб олишни талаб қилиш ҳуқуқи юзага келишига сабаб бўлган қарор қабул қилинган санадаги жамият соф активлари қийматининг ўн фоизидан ошиб кетиши мумкин эмас.

Сўзга бош ҳисобчи З.Миримов чиқиб, “Тўрткўл пахта тозалаш” АЖнинг бир дона акцияси “Xorazm expert baholash” МЧЖ томонидан 2025 йил 26 августда 23 469 сўмга баҳоланганлигини айтиб ўтди.

Муҳокмалардан сўнг, йиғилишда раислик қилувчи Е.Кунназаров акциядорлардан кун тартибидаги масала бўйича ўз муносабатларини бюллетенда овоз бериш орқали билдиришни таклиф этди.

Ушбу масала юзасидан овоз бериш натижалари:

“Ёқлаганлар” – 29 838 та овоз; “Қаршилар”- 212 484; “Бетарафлар”- йўқ.
Нотўғри тўлдирилган бюллетенлар йўқ.

Кун тартибидаги бешинчи масала бўйича акциядорларнинг навбатдан ташқари умумий йиғилиши **қарор қилади:**

1. Жамиятнинг директори Ж.Серикбаевга Ўзбекистон Республикаси “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги қонунининг 40,41-моддасларига мувофиқ:

- жамиятни қайта ташкил этиш масаласида умумий йиғилишда қарши овоз берган ёхуд овоз беришда узрли сабабларга кўра иштирок этмаган акциядорларни ўзларига тегишли акцияларнинг жамият томонидан қайтариб сотиб олинишини талаб қилиш ҳуқуқи мавжудлиги, қайтариб сотиб олиш нархи ва қайтариб сотиб олишни амалга ошириш тартиби тўғрисида қайтариб сотиб олинишини талаб қилиш ҳуқуқи юзага келишига сабаб бўлган қарор қабул қилинган кундан эътиборан етти кундан кечиктирмай хабардор этиш;

- акциядорлар умумий йиғилиши қарори қабул қилинган кундан (15.10.2025 йилдан) эътиборан ўттиз кундан кечиктирмай жамиятга акцияларни қайтариб сотиб олиниши тўғрисидаги ёзма талаблар билан мурожаат қилган акциядорлардан акцияларни қонунчиликда белгиланган тартибда ва муддатда баҳоланган қийматда бир дона акцияни 23 469,0 (йигирма уч минг тўрт юз олтимиш тўққиз) сўм қийматда сотиб олиш вазифаси юклатилсин.

Бунда, жамият томонидан акцияларни қайтариб сотиб олишни талаб қилиш ҳуқуқи юзага келишига сабаб бўлган қарор қабул қилинган санадаги соф активлари қийматининг ўн фоизидан ошиб кетиши мумкин эмас.

Акциядорларнинг навбатдан ташқари умумий йиғилиши қарорлари ўқиб эшиттирилгандан сўнг, умумий йиғилиш ёпиқ деб эълон қилинди.

Йиғилишда раислик қилувчи:



 **Е.Кунназаров**

Йиғилиш котиби:

 **З.Миримов**

Йиғилиш баённомаси имзоланган сана 2025 йил 22 октябрь .